

人君可執其柄

其施之多寡厚薄然後乃得其平若不問其是非曲直而待之如一則是善者常不得伸而惡者反幸而免以此為平是乃所以為大不平也故雖堯舜之治既舉元凱必放其兇此又易象所謂遏惡揚善順天休命者也蓋善者天理之本然惡者人欲之邪妄是以天之為道既福善而禍淫又以賞罰之權寄之司牧使之有以補助其禍福之所不及然則為人君者可不謹執其柄而務有以奉承之哉

性理大方書卷之六十八

性理大書卷之六十九

圖

治道四

王伯

王道本乎人情
二者在審其初
治天下者必先立其志

程子曰得天理之正極人倫之至者堯舜之道也其私心依仁義之偏者伯者之事也王道如砥本乎人情出乎禮義若履大路而行無復回曲伯者崎嶇反側於曲徑之中而卒不可與入堯舜之道故誠心而王則王矣假之而伯則伯矣二者其道不同在審其初而已易所謂差若毫釐謬以千里者其初不可不審也故治天下者必先立其志

性理大

卷六十九

王者奉若天道

王者動無非天

王者道者

先立則邪說不能移異端不能惑故力進於道而莫之禦也苟以伯者之心而來王道之誠是銜石以爲玉也故仲尼之徒無道桓文之事而曾西恥比管仲者義所不由也况下於伯者哉○王者奉若天道動無非天者故稱天王命則天命也討則天討也盡天道者王道也後世以智力持天下者伯道也

陳水司馬氏曰合天下而君之之謂王王者必立三公

公二十公分天下而治之曰二伯一公處乎內皆王

官也周衰二伯之職廢齊桓晉文糾合諸侯以尊

天子天子因命之爲侯伯修舊職也伯之語轉而

爲霸霸之名自是興

問如管仲之才使孔子得志行乎天下還用之否龜

山楊氏曰管仲高才自不應廢但綱紀法度不出

自他儘有用處曰若不使他自爲或不肯退聽時

如何曰如此則聖人廢之不問其才又曰王道本

於誠意觀管仲亦有是處但其意別耳如伐楚事

責之以包茅不貢其言則是若其意豈爲楚不勤

王歟後加兵但欲楚尊齊耳尊齊而不尊周管仲

亦莫之詰也若實尊周專封之事仲豈安爲之故

王道本於誠意

王者純用公道

孔孟規模自別

孟子曰五伯假之也蓋言其不以誠爲之也又曰自孟子後人不敢小管仲只爲見他不破近世儒者如荆公雖知卑管仲其實亦識他未盡况於餘人若知王良羞與嬖奚比比而得禽獸雖若丘陵弗爲之意則管仲自然不足道又曰管仲只爲行詐故與王者別若王者純用公道而已○問或謂衛於王室爲近懿公爲狄所滅齊桓公攘夷狄而封之當是時夷狄橫而中國微桓公獨能如此故孔子曰微管仲吾其被髮左衽矣爲其功如此也觀晉室之亂胡羯猖獗於中原當是時只爲無一管仲故顛沛如此然則管仲之功後世信難及也曰若以後世論之其功不可謂不大自王道觀之則不可以爲大也今人只爲見管仲有此故莫敢輕議不知孔孟有爲規模自別見得孔孟作處則管仲自小曰孔孟如何曰必也以天保以上治內以采薇以下治外雖有夷狄安得遽至中原乎如小雅盡廢則政事所以自治者俱亡四夷安得而不交侵中國安得而不微方是時縱能救之於已亂雖使中國之人不至被髮左衽蓋猶賢乎周衰之列國耳何足道哉如孟子所以敢輕鄙之者

蓋以非王道不行故也曰然則孔子何爲深取之
曰聖人之於人雖有毫末之善必錄之而况於仲
乎若使孔子得君如管仲則管仲之事蓋不暇爲
矣

問管仲之功孔子與之其曰如其仁何也和靖尹氏
曰如似也與其功而不與其仁問何故不與其仁
曰只爲大本錯了問如何是大本錯曰且如初相
子糾其錯亦大矣問如何是錯曰觀春秋所書莊
公九年夏公伐齊納子糾齊小白入于齊九月齊
人取子糾殺之可見也管仲功高豈可補過但只
是忍恥能就其功故孔子與其功也其於仁也何
有若夫舍王道而行伯道以富國強兵爲本則更
不待論也如責包茅不入昭王不返亦謂假仁以
行其伯孟子雖說久假而不歸然怎生謂之假豈
能久而不歸若到得不歸處時只是假之以成功
也然桓公尚在五伯中爲盛者也孟子責管仲功
烈如此其畧者以其不能行王道以至于仁也孔
子謂九合諸侯一正天下者以其功也孔孟之意
則同舍此皆穿鑿也問孔門羞稱五伯何也曰七
十子之徒皆未必能作得管仲之功然所以羞稱

孔孟
之意
則同

者只爲錯了大本不知學者也學者不可不知此也

三王
正名
興利

五峰胡氏曰三王正名興利者也故其利大而流長

五伯假名爭利者也故其利小而流近

豫章羅氏曰王者富民伯者富國富民三代之世是也富國齊晉是也至漢文帝行王者之道欲富民而告戒不嚴民反至於奢武帝行伯者之道欲富國而費用無節國反至於耗

須先
明王
伯之
辨

南軒張氏曰學者要須先明王伯之辨而後可論治

體王伯之辨莫明於孟子大抵王者之政皆無所爲而爲之伯者則莫非有爲而然也無所爲者天理義之公也有所爲者人欲利之私也考左氏所載齊桓晉文之事其間豈無可喜者要莫非有所爲而然考其迹而其心術之所存固不可掩也

問王伯如何分別潛室陳氏曰司馬溫公無王伯之辨要之源頭只是王伯兩字以其爲天下王故謂之王以其爲方伯故謂之伯以王天下言之謂之王猶伯之爲伯也未見其美玉砥礪之辨後來制字有不備故伯字有霸字王字只是王字點發爲之然伯字亦無詐力之義故言三王以其王天下

義信禮為國之本

也言五伯以其伯諸侯也自其有三王之至公有五伯之智力而後有王伯是非誠偽之分故今之言王伯之分者當以孟子德行仁力假仁為正西山真氏曰義信禮為國之本不可一日離古之王者動必由之非有所為而為之也子犯之為晉文公謀必曰示之義示之信示之禮則皆有為而為之矣王伯辯駁之異其不以此哉

田賦

或問井田今可行否程子曰豈古可行而今不可行者或謂今人多地少不然譬諸草木山上著得許多便生許多天地生物常相稱豈有入多地少之理○問古者百畝今四十一畝餘若以土地計之所收似不足以供九人之食曰百畝九人固不足通天下計之則亦可家有九人只十六已別受田其餘皆老少也故可供有不足者又有補助之政又有鄉黨調揀之義故亦可足○又嘗與張子厚論井地曰地形不必謂寬平可以畫方只可用算法折計地畝以授民子厚謂必先正經界經界不正則法終不定地有坳垤不管只觀四標竿中間地雖不平饒與民無害就一夫之間所爭亦不多

又側峻處田亦不甚美又經界必須正南北假使地形有寬狹尖斜經界則不避山河之曲其田則就得井處爲井不能就成處或五七或三四或一夫其實四數則在又或就不成一夫處亦可計百畝之數而授之無不可行者如此則經界隨山隨河皆不害於畫之也苟如此畫定雖便使暴君汗吏亦數百年壞不得經界之壞亦非專在秦時其來亦遠漸有壞矣又曰井田今取民田使貧富均則願者衆不願者寡正叔言亦未可言民情怨怒正論不可爾須使上下都無怨怒方可行

藍田呂氏曰古之取民貢助徹三法而已較數歲之中以爲常是爲貢一井之地八家八家皆私百畝同治公由百畝是爲助不爲公由俟歲之成通以十一之法取于百畝是爲徹

龜山楊氏曰先王爲比閭族黨州鄉以立軍政居則爲力耕之農出則爲敵愾之士蓋當是時天下無不受田之夫故均無貧焉而人知食力而已游惰姦凶不軌之民無所容於其間也

五峰胡氏曰仁心立政之本也均田爲政之先也田里不均雖有仁心而民不被其澤矣井田者聖人

仁心
立政
之本

聖人
均田
要法

王者
佐乾
坤贊
化育
之功

均田之要法也。恩意聯屬，死不容少而不散多，而不亂農賦既定，軍制亦明矣。三王之所以王者，以其能制天下之田里，政立仁施，雖匹夫匹婦一衣一食如解衣衣之如推食食之，其於萬物誠有調燮之法，以佐贊乾坤化育之功。

華陽范氏曰：自井田廢而貧富不均，後世未有能制民之產，使之養生送死而無憾者也。立法者未嘗不欲抑富而或益助之，不知富者所以能兼并由貧者不能自立也。貧者不能自立，由上之賦斂重而力役繁也。為國者必曰：財用不足，故賦役不可以省。蓋亦反其本矣。昔哀公以年饑用不足問於有若，有若曰：盍徹乎？夫徹非所以裕用，然欲百姓與君皆足，必徹而後可也。後之為治者，三代之制雖未能復，唯省其力役，薄其賦斂，務本抑末，尚儉去奢，占田有限，困窮有養，使貧者足以自立而富者不得兼之，此均天下之本也。不然，雖有法令徒文具而已，何益於治哉？

問：橫渠謂世之病井田難行者，以亟奪富人之田為辭，然處之有術，期以數年不刑一人而可復，不審井議之行於今果如何？朱子曰：講學時且低講若。

欲行之須有機會經太亂之後天下無火田盡歸官方可給與民如唐口分世業是從魏晉積亂之極至元魏及北齊後周乘此機方做得荀悅漢紀一段正說此意甚好若平世則誠為難行

東萊呂氏曰孔子言王道曰道千乘之國敬事而信節用而愛人使民以時孟子言王道須說百畝之田八口之家及材木不可勝用之類何故須說許多以此見得春秋時井田尚在戰國時已自大故廢須要人整頓如史記說決裂阡陌以靜天下之業又以此見得井田亦不易廢

理財

龜山楊氏曰古之制國用者量入以爲出故以九賦歛之而後以九式均節之使用財無偏重不足之處所謂均節也取之有藝用之有節然後足以服邦國以致其用先王所謂理財者亦均節之使當理而已○周官泉府之官以市之征布歛市之不售貨之滯於民用以其價賈之物揭而書之以待不時而買者夫物貨之有無民用之贏乏常相因而至也不售者有以歛之蓋將使行者無滯貨非以其賤故買之也不時買者有以待之蓋將使居

者無乏用非以其貴故賣之蓋所以阜通貨賄也
此商賈所以願藏於王之市而有無贏之皆濟矣
○先生所謂理財者非盡籠天下之利而有之也
取之以道用之有節各當於義之謂也取之不以
其道用之不以其節而不當於義則非理矣故周
官以九職任之而後以九賦斂之其取之可謂有
道矣九賦之入各有所待如關市之賦以待王之
膳服邦中之賦以待賓客之類是也邦之大用內
府待之邦之小用外府受焉有司不得而侵紊之
也冢宰以式均節之下至工事芻秣之微匪頒
好用皆有式焉雖人主不得而逾之也所謂惟王
及后世子不會特膳服之類而已有不如式雖有
司不會冢宰得以式論之矣○什一天下之中制
自堯舜以來未之有改也取其所當取則利即義
矣故曰國不以利為利以義為利則義利初無二
致焉

朱子曰古者荒歲方鑄錢周禮所謂國凶荒札喪則
市無征而作布既可因此以養饑民又可以權物
之重輕蓋古人錢關方鑄錢以益之

節儉

仁宗恭儉
出於天性

程子曰仁宗一日問折米折幾分曰折六分怪其太甚也有旨只令折五分之供進偶覺藏府痛曰習使然也却令如舊又一日思生荔枝有司言已供盡近侍曰有鬻者請買之上曰不可令買來歲必增上供之數流禍百姓無窮又一日夜中甚饑思燒羊頭近侍乞宣取上曰不可令取之後必常備日殺三羊暴殄無窮竟夕不食

元城劉氏曰仁宗恭儉出於天性故四十二年如一日也易所謂有始有卒者世以明皇初節儉後奢修疑相去遼絕此說非也此正是一箇見識耳夫

錦繡珠玉世之所有也已不好之則不用何至焚之焚之必於前殿是欲人知之此好名之弊也太恭儉不出於天性而出於好名好名之心衰則其奢侈必甚此必至之理也故當時識者見其焚珠玉知其必有末年之弊若仁宗則不然若非大臣問疾則無由見其黃紬被漆堊壺

五峰胡氏曰上侈靡而細民皆衣帛食肉此饑寒之所由生盜賊之所由作也天下如是上不知禁又益甚焉然而不亡者未之有也

朱子曰先聖之言治國而有節用愛人之說蓋國家

財用皆出於民如有不節而用度有闕則橫賦暴斂必將有及於民者雖有愛人之心而民不被其澤矣是以將愛人者必先節用此不易之理也

東萊呂氏曰古人自奉簡約類非後人所能及如飲食高下自有制度諸侯無故不殺牛大夫無故不殺羊士無故不殺犬豕此猶是極盛時制度也太抵古人得食肉者至少如食肉之祿冰皆與焉肉食者謀之肉食無墨此言貴者方得肉食也此之後人簡約甚矣

晉齋許氏曰地力之生物有大數人力之成物有大限取之有度用之有節則常足取之無度用之無節則常不足生物之豐歉由天用物之多少由人○天地間爲人爲物皆有分限分限之外不可過求亦不得過用暴殄天物得罪於天

賑恤

元城劉氏曰昔堯有九年之水湯遇七年之旱而國無捐瘠之民者蓋備之有素而已○聖王爲國必有九年之蓄故雖遇旱乾水溢之災民無菜色今歲一不登人且狼狽若有司不度事勢拘執故常必俟春夏之交方行祈禱之理民已艱食旋爲賑

貸之計所謂大寒而後索衣裘亦無及矣

龜山楊氏曰先王之時三年耕有一年之積故凶年饑歲民免於死亡以其豫備故也不知爲政乃欲髮其人而取其資以爲賑饑之術正孟子所謂雖得禽獸若丘陵弗爲也

朱子曰天先王之世使民三年耕者必有一年之蓄故積之三十年則有十年之蓄而民不病於凶饑此可謂萬世之良法矣其次則漢之所謂常平者其法亦未嘗不善也○救荒之政蠲除賑貸固當汲汲於其始而撫存休養尤在謹之於其終譬如

附說
救荒

傷寒太病之人方其病時湯劑砭灸固不可以少緩而其既愈之後飲食起居之間所以將護節宣少失其宜則勞復之證百死一生尤不可以不深畏也○自古救荒自有兩說第一是感名和氣以致豐穰其次只有儲蓄之計若待他餓時理會更有何策○或說救荒賑濟之意固善而取出之數不節不可黃直卿云制度雖只是這箇制度用之亦在其人如糴米賑饑此固是但非其人則做這事亦將有不及事之患曰然○嘗謂爲政者當順五行修五事以安百姓若曰賑濟於凶荒之餘縱

饒措置得善所惠者淺終不濟事○賑饑無奇策不如講求水利到賑濟時成甚事

象山陸氏曰社倉固爲農之利然年常豐田常熟則其利可久苟非常熟之田一遇歉歲則有散而無斂來歲闕種糧時乃無以賑之莫若兼置平糶一倉豐時糶之使無價賤傷農之患闕時糶之以摧富民閉廩騰價之計析所糶爲二每存其一以備歉歲代社倉之匱實爲長利也

禎異

程子曰陰陽運動有常而無忒凡失其度皆人爲感之也故春秋災異必書漢儒傳其說而不得其理是以所言多失○或問鳳鳥不至河不出圖不知符瑞之事果有之否曰有之國家將興必有禎祥人有喜事氣見面自聖人不貴祥瑞者蓋因災異而修德則無損因祥瑞而自恃則有害也問五代多祥瑞何也曰亦有此理譬如盛冬時發出一花相似和氣致祥乖氣致異此常理也然出不以時則是異也如麟是太平和氣所生然後世有以麟駕車者却是怪也譬如水中物生於陸陸中物生於水豈非異乎又問漢文多災異漢宣多祥瑞何

聖人不貴祥瑞

也曰且譬如小人多行不義人却不說至君子未
有一事便生議論此是一理也至白者易汚此是
一理也詩中幽王太惡爲小惡宣王小惡爲太惡
此是一理又問日食有常數何治世少而亂世多
豈人事乎曰理會此到極處煞燭理明也天人之
際甚微更思索曰莫是天數人事看那邊勝否
曰似之然未易言也又問魚躍于王舟火復于王
屋流爲烏有之否曰魚與火則不可知若兆朕之
先應亦有之○或問東海殺孝婦而旱豈國人冤
之所致邪曰國人冤固是然一人之意自足以感
動天地不可道殺孝婦不能致旱也或曰殺姑而
雨是衆人冤釋否曰固是衆人冤釋然孝婦冤亦
釋也其人雖亡然冤之之意自在不可道殺姑不
能釋婦冤而致雨也

五峯胡氏曰變異見於天者理極而通數窮而更勢
盡而反氣滋而息興者將廢成者將敗人君皆天
命之主所宜盡心也德動於氣吉者成凶者敗大
者興小者廢夫豈有心於彼此哉謂之譴告者人
君觀是宜以自省也若以天命爲待遇災不懼肆
淫心而出暴政未有不亡者也

人君
天命
之主

聖王
修德
正事

朱子曰商中宗時有桑穀並生于朝一莫大拱中宗能用巫咸之言恐懼修德不敢荒寧而商道復興享國長久至于七十有五年高宗祭于成湯之廟有飛雉升鼎耳而鳴高宗能用祖己之言克正厥事不敢荒寧而商用嘉靖享國亦久至于五十有九年古之聖王遇災而懼修德正事故能變災爲祥其效如此

象山陸氏曰昔之言災異者多矣如劉向董仲舒李尋京房翼奉之徒皆通乎陰陽之理而陳於當時者非一事矣然君子無取焉者爲其著事應之說也孔子書災異於春秋以爲後主戒而君子有取焉者爲其不著事應故也夫旁引物情曲指事類不能無偶然而合者然一有不合人君將忽焉而不懼孔子於春秋著災異不著事應者實欲人君無所不謹以答天戒而已

西山真氏曰祥多而恃未必不危異衆而戒未必不安顧人主應之者如何耳

曾齊許氏曰三代而下稱盛治者無若漢之文景然考之當時天象數變如日食地震山崩水潰長星彗星孛星之類未易遽數前此後此凡若是者小

文景
克承
天心

則有水旱之應大則有亂亡之應未有徒然而已者獨文景克承天心消弭變異使四十年間海內殷富黎民樂業移告訐之風為醇厚之俗且建立漢家四百年不拔之業猗歟偉歟未見其比也秦之苦天下久矣加以楚漢之戰生民糜滅戶不過萬文帝承諸呂變故之餘入繼正統專以養民為務其憂也不以已之憂為憂而以天下之憂為憂其樂也不以已之樂為樂而以天下之樂為樂今年下詔勸農桑也恐民生之不遂明年下詔減租稅也慮民用之或乏懇愛如此宜其民心得而和

氣應也○或問天變曰胡氏一說好如父母嗔怒或是子婦有所觸瀆而怒亦有父母別生憂惱時為子者皆當恐懼修省此言殊有理

論兵

兵以
正為
本

程子曰兵以正為本動眾以毒天下而不以正則民不從而怨敵生亂亡之道也是以聖王重焉東征西怨義正故也又曰行師之道以號令節制行師無法幸而不敗且勝者時有之矣聖人之所戒也○用兵以能聚散為上○兵陣須先立定家計然後以遊騎旋旋量力分外面與敵人合此便是合

內外之道若遊騎太遠則却歸不得至如聽金鼓聲亦不忘却自家如何如符堅一敗便不可支持無本故也○技擊不足以當節制節制不足以當仁義使人人有子弟衛父兄之心則制挺以撻秦楚之兵矣○韓信多多益辦分數明而已○管轄人亦須有法徒嚴不濟事今帥千人能使千人依時及節得飯喫只如此者能有幾人嘗謂軍中夜驚亞夫堅臥不起不起善矣然猶夜驚何也亦是未盡善○善兵者有一萬人未必死彼雖十萬人亦未必能勝一萬人古者以少擊衆而取勝者多

蓋兵多亦不足恃昔者袁紹以十萬阻官渡而曹操只以萬卒取之王莽百萬之衆而光武昆陽之衆有八千仍有在城中者然則只是數千人取之符堅下淮百萬而謝玄纔一萬人一麾而亂以此觀之兵衆則易老適足以資敵人一敗不支則自相蹂踐至如聞風聲鶴唳皆以爲晉軍之至則是自相蹂也譬之一人軀幹極大一人輕捷兩人相當則擁腫者遲鈍爲輕捷者出入左右之則必困矣○餽運之術雖自古亦無不煩民不動搖而足者然於古則有兵車其中載糗糧百人破二十五

人然古者行兵在中國又不遠敵若是深入遠處則決無省力且如秦運海隅之粟以饋邊率二十鍾而致一石是一百倍以來今日師行一兵行一夫饋只可供七日其餘日必俱乏食也且計之須三夫而助一兵仍須十五日便回一日不回則一日之食以此校之無善術故兵也者古人必不得已而後用者知此耳

龜山楊氏曰自黃帝立丘乘之法以寓軍政歷世因之未之有改也至周爲尤詳居則爲比閭族黨州鄉出則爲伍兩軍師之制使之相保相愛刑罰慶賞相及用一律也天子無事歲三田以供祭祀賓客充君之庖而已其事宜若緩而不切也而王執路鼓親臨之教以坐作進退有不用命者則刑戮隨之其教習之嚴如此故六鄉之兵出則無不勝以其威令素行故也丘井之廢久矣兵農不可以復合而伍兩軍師之制不可不講無事之時使之相保相愛刑罰慶賞相及用之於有事之際則申之以卒伍之令督之以旌旗指揮之節臨難而不相救見敵而不用命必戮無赦使士卒畏我而不畏敵然後可用若夫伍法不修雖有百萬之師如

聖人
著經
為後
世法

養驕子不可用也。傳曰：秦之銳士不可當，齊晉之
節制，齊晉之節制不可以當，湯武之仁義，其竊謂
雖有仁義之兵，苟無節制，亦不可以取勝。甘誓曰：「
左不攻于左，汝不恭命；右不攻于右，汝不恭命；弗
用命，則孥戮之。」牧誓曰：「不愆于六步七步，乃止齊
焉，不愆于四伐五伐六伐，乃止齊焉。」其節制之嚴，
蓋如此。故聖人著之於經，以為後世法也。故諸葛
孔明曰：「有制之兵，無能之將，不可以敗；無制之兵，
有能之將，不可以勝。」此之謂也。○韓信用兵，在楚
漢之間，則為善矣。方之五伯，自己不及，以無節制
故也。如信之軍，修武高祖即其臥內奪之，印易置。
諸將信尚未知此，與棘門霸上之軍何異？但信用
兵能以術驅人，使自為戰，當時亦無有以節制之
兵當之者。故信數得以取勝也。王者之兵，未嘗以
術勝人，然亦不可以計敗。後世惟諸葛亮、李靖為
知兵。如諸葛亮已死，司馬仲達觀其行營，軍壘不
覺歎服。而李靖惟以正出奇，此為得法制之意，而
不務僥倖者也。古人未嘗不知兵，如周官之法，雖
坐作進退之末，莫不有節。若平時不學，一旦緩急，
何以應敵？如此，則學者於行師御眾戰陣管壘之

事不可不講。○或問今之爲將帥者不必用狙詐固是。柰兵官武人之有智略者莫非狙詐之流若無狙詐如何使人曰君子無所往而不以誠但至誠惻怛則人自感動曰至誠惻怛可也然今之置帥朝除暮易若以至誠爲務須是積久上下相諳其效方見卒然施之未必有補曰誠動於此物應於彼速於影響豈必在久如郭子儀守河陽李光弼代之一號令而金鼓旗幟爲之精明此特其號令各有體耳

華陽范氏曰古之明主天下有不順者必諄諄而告教之至于再至于三若之不可然後征之則其民知罪而用兵有辭矣

朱子曰先王之制內有六鄉六遂都鄙之兵外有方伯連帥之兵內外相維緩急相制○本強則精神折衝不強則招殃致凶○兵法以能分合爲變不獨一陣之間有分合天下之兵皆然○兵之勝負全在勇怯又曰用兵之要敵勢急則自家當委曲以纏繞之敵勢緩則自家當勁直以衝突之○斷殺無巧妙只是死中求生兩軍相拄一邊立得腳住不退卽贏矣須是死中求生方勝也○書戰聽

金鼓夜戰看火候嘗疑夜間不解戰蓋只是設火候防備敵來劫寨之屬古人屯營其中盡如井形於巷道十字處置火候如有間諜一處舉火則盡舉更走不得○管仲內政士鄉十五乃戰士也所以教之孝悌忠信尊君親上之義夫子曰以不教民戰是謂棄之故雖伯者之道亦必如此○五代時兵甚驕矣周世宗高平一戰既敗却忽然誅不用命者七十餘人三軍大振遂復合戰而克之凡事都要人有志○或言古人之兵當如子弟之衛父兄而孫吳之徒必曰與士卒同甘苦而後可足子弟必待父兄施恩而後報也曰巡而拊之三軍之士皆如挾纊此意也少不得○陣者定也八陣圖中有奇正前固雖未整齊然遇敵次列便已成正軍矣○或問史記所書高祖垓下之戰李通以爲正合八陣之法曰此亦後人好奇之論大凡有兵須有陣不成有許多兵馬相戰鬪只象作一團又只排作一行必須左右前後部伍行陣各有條理方得今且以數人相撲言之亦須擺布得所而後相角今人但見史記所書甚詳漢書則略之便以兩馬遷爲曉兵法班固爲不曉此皆好奇之論

選擇將帥之術

不知班固以爲行陣乃用兵之常故略之從省文爾看古來許多陣法遇征戰亦未必用得所以張巡用兵未嘗倣古兵法不過使兵識將意將識主情蓋未論臨機應變方略不同只如地圓則須布圓陣地方則須布方陣亦豈容槩論也又曰常見者將說太要臨陣又在審休通上分一軍爲數替將戰則食第一替人既飽遣之入陣便食第二替人覺第一替人力將困卽調發第二替人往代第三替人亦如之只管如此更番則士常飽健而不至困之○問選擇將帥之術曰當無事之時欲識得將須是具大眼力如蕭何識韓信方得

南軒張氏曰君子於天下之事無所不當究况於兵者世之興廢生民之大本存焉其所忽而不講哉夫兵政之本在於仁義其爲教根乎三綱然至於法度紀律機謀權變其條不可紊其端爲無窮非素考索焉能極其用一有所未極則於酬酢之際其失將有間不容髮者可不畏哉

東萊呂氏曰後世用兵者以爲黃石一書無與比者不知黃石公未出之前三代之兵一舉而無敵於天下兵書何在黃石公有二秘法在人間人自不

識三代之得天下亦不過此道唯仁丁字爾

西山真氏曰古之用武者不急於治兵而急於擇將將之勇怯與實係焉故天下無必勝之兵而有不可敗之將昔人未嘗不用民兵也然既募之後則有紀律焉馬燧之練戍精卒是也方募之始則有差擇焉馬隆之立標揀試是也

鶴山魏氏曰余少讀書於十三卦制作之象見所謂門枨以待暴客弧矢以威天下每嘆風氣既開人情易動雖黃帝堯舜有不密不先事而為慮者及觀古制之詳莫備於周有井牧之田有伍兩之兵有溝樹之固有郊關之限有巡警之警有壺樣之守不得已而用民也則鄉遂三邑三等采地以次召發不止則諸侯又不止也則有遍境出之法乃知古人雖以禮義廉耻為城民固國之道然未嘗不設險用師以輔之也

論刑

龜山楊氏曰文帝之去肉刑其用志固善也夫紂作炮烙之刑其甚至於剗剔孕婦則雖秦之用刑不慘於是矣而商之頑民亦非素教不聞周繼之而廢肉刑也豈武王周公皆忍人哉若文帝之承秦

仁養得人
心其以主

德生以天
為好子

蓋亦務為厚養而素教之耳不思所以教養之而去肉刑是亦圖其末也則王通謂其傷於義恐未為過論及夫廢之已久而崔鄭之徒乃驟議復之則其不知本末也甚矣○或曰特旨乃人君威福之權不可無也曰不然古者用刑王三宥之若案法定罪而不敢赦則在有司夫惟有司守法而不移故人主得以養其仁心今也法不應誅而人主必以特旨誅之是有司之法不必守而使人主失仁心矣○因論特旨曰此非先王之道先王只是好生故書曰好生之德洽于民心為天子豈應以殺人為已任孟子曰國人皆曰可殺然後殺之故曰國人殺之也謂國人殺之則殺之者非一人之私意不得已也古者司寇以獄之成告于王王命三公參聽之三公以獄之成告于王王三宥然後致刑夫宥之者天子之德而刑之者有司之公天子以好生為德有司以執法為公則刑不濫矣若罪不當刑而天子必刑之寧免於濫乎然此事其漸有因非獨人主之過使法官得其人則此弊可去矣舜為天子若瞽瞍殺人臯陶得而執之舜猶不能禁也且法者天下之公豈宜徇一人之意嘗

怪張釋之論渭橋犯蹕事謂宜罰金文帝怒釋之對曰法者天子所與天下公共也今法如是更重之是法不信於民也此說甚好然而曰方其時上使人誅之則已以謂爲後世人主開殺人之端者必此言也夫旣曰法天子與天下公共則得罪者天子必付之有司安得擅殺使當時可使人誅之今雖下廷尉越法而誅之亦可也

五峯胡氏曰生刑輕則易犯是教民以無耻也死刑重則難悔是絕民自新之路也死刑生刑輕重不相懸然後民知所避而風化可興矣

張徐以恕求情

豫章羅氏曰朝廷立法不可不嚴有司行法不可不恕不嚴則不足以禁天下之惡不恕則不足以通天下之情漢之張釋之唐之徐有功以恕求情者也常衮一切用法四方奏請莫有獲者彼庸人哉天下後世典獄之官當以有功爲法以衮爲戒朱子曰昔者帝舜以百姓不親五品不遜而使契爲司徒之官教以人倫父子有親君臣有義夫婦有別長幼有序朋友有信又慮其教之或不從也則命皋陶作士明五刑以弼五教而期于無刑焉蓋三綱五常天理民彝之太節而治道之本根也故

聖人之治爲之教以明之爲之刑以弭之雖其所
施或先或後或緩或急而其丁寧深切之意未嘗
不在乎此也乃若三代王者之制則亦有之曰凡
聽五刑之訟必原父子之親立君臣之義以權之
蓋必如此然後輕重之序可得而論淺深之量可
得而測而所以悉其聰明致其忠愛者亦始得其
所施而不悖此先王之義刑義殺所以雖或傷民
之肌膚殘民之軀命然刑一人而天下之人聳然
不敢肆意於爲惡則是乃所以正直輔翼而若其
有常之性也後世之論刑者不知出此其陷於申
商之列薄者旣無足論矣至於鄙儒姑息之論異
端報應之說俗吏便文自營之計則又一以輕刑
爲事然刑愈輕而愈不足以厚民之俗往往反以
長其悖逆作亂之心而使獄訟之愈繁則不講乎
先王之法之過也○以舜命皋陶之辭考之士官
所掌惟象流一法而已鞭扑以下官府學校隨事施行不領於士官之事
也其曰惟明克允則或刑或宥亦惟其當而無以
加矣又豈一於宥而無刑哉今必曰堯舜之世有
宥而無刑則是殺人者不死而傷人者不刑也是
聖人之心不忍於元惡太憝而反忍於嚚窳抱痛

之良民也是所謂怙終賊刑刑故無小者皆爲空
言以誤後世也其必不然也亦明矣夫刑雖非先
王所特以爲治然以刑弼教禁民爲非則所謂傷
肌膚以懲惡者亦既竭心思而繼之以不忍人之
政之一端也今徒流之法既不足以止穿窬淫放
之姦而其過於重者則又有不當死而死如強暴
賊滿之類者苟采陳羣之議一以宮刑之辟當之
則雖殘其支體而實全其軀命且絕其爲亂之本
而使後無以肆焉豈不仰合先王之意而下適當
世之宜哉况君子得志而有爲則養之之具教之
之術亦必隨力之所至而汲汲焉固不應因循苟
且直以不養不教爲當然而熟視其爭奪相殺於
前也○獄事人命所繫尤當盡心近世流俗惑於
陰德之論多以縱出有罪爲能而不思善良之無
告此最弊事不可不戒然哀矜勿喜之心則不可
無也○今人說輕刑者只見所犯之人爲可憫而
不知被傷之人尤可念也如劫盜殺人者人多爲
之求生殊不念死者之爲無辜是知爲盜賊計而
不爲良民地也若如飢荒竊盜之類猶可以情原
其輕重大小而處之○今人獄事只管理會要從

厚不知不問是非善惡只務從厚豈不長姦惠惡
太凡事付之無心因其所犯考其實情輕重厚薄
付之當然可也若從薄者固不是只云我只要從
厚則此病所係亦不輕○今之法家惑於罪福報
應之說多喜出人罪以求福報夫使無罪者不得
直而有罪者得倖免是乃所以爲惡爾何福報之
有書曰欽哉欽哉惟刑之恤哉所謂欽恤者欲其
詳審曲直令有罪者不得免而無罪者不得濫刑
也今之法官惑於欽恤之說以爲當寬人之罪而
出其死故凡罪之當殺者必多爲可出之塗以候
奏裁則率多減等當斬者配當配者徒當徒者杖
當杖者笞是乃賣弄條貫舞法而受賕者耳何欽
恤之有罪之疑者從輕功之疑者從重所謂疑者
非法令之所能決則罪從輕而功從重惟此一條
爲然耳非謂凡罪皆可以從輕而凡功皆可以從
重也

南軒張氏曰治獄所以多不得其平者蓋有數說吏
與利爲市固所不論而或矜知巧以爲聰明持姑
息以惠姦慝上則視太官之趨向而重輕其手下
則惑胥吏之浮言而二三其心不盡其情而一以

威怵之不原其初而一以法繩之如是而不得其
平者抑多矣無是數者之患郵罰麗於事而深存
哀矜勿喜之意其庶幾乎在上者又當端其心
勿以喜怒好惡一毫先之聽獄之成而審度其中
隱於吾心竭忠愛之誠明教化之端以期無訟爲
本則非惟可以臻政平訟理之效而收輯人心感
名和氣其於邦本所助豈淺也哉

象山陸氏曰獄訟惟得情爲難唐虞之朝惟臯陶見
道甚明羣聖所宗舜乃使之爲士周書亦曰司寇
蘇公式敬爾由獄賁象亦曰君子以明庶政無敢

天舜
孔子
寬仁
之實

折獄賁乃山下有火火爲至明然猶言無敢折獄
此事正是學者用工處噬嗑離在上則曰利用獄
豐離在下則曰折獄致刑蓋貴其明也○夫五刑
五用古人豈樂施此於人哉天討有罪不得不然
耳是故大舜有四裔之罰孔子有兩觀之誅善觀
大舜孔子寬仁之實者於四裔兩觀之間而見之
矣近時之言寬仁者則異於是蓋不究夫寬仁之
實而徒欲爲容姦度隱之地殆所謂以不禁姦邪
爲寬大縱釋有罪爲不苛者也罪疑惟輕罪而有
疑固宜爲輕與其殺不辜寧失不經謂罪疑者也

使其不輕甚明而無疑則天討所不容釋豈可失也宥過無大刑故無小使在趨走使令之間簿書期會之際偶有過誤宥之可也若其貪黷姦先出於其心而至於傷民蠹國則何以宥爲於其所不可失而失之於其所不可宥而宥之則爲傷善爲長惡爲悖理爲不順天殆非先王之政也

夷狄

或問蠻狄猾夏處之若何而後安程子曰諸侯方伯明大義以攘却之義也其餘列國謹固封疆可也若與之和好以苟免侵暴則亂華之道也是故春

秋謹華夷之辨

元城劉氏曰中國與夷狄爲鄰正如富人與貧人鄰居待之以禮結之以恩高其墻垣威以刑法待之以禮則國家每有使命往來有立定條貫禮數束縛之也結之以恩則歲時嘗以遺餘之物厭飽之也高其墻垣則平日講和而不失邊備也威以刑法待其先犯邊然後當用兵也

龜山楊氏曰邊事之興多出於饕功幸利之人黷武玩寇不以朝廷大計爲念視生靈荼毒若非已事恬不以爲戚夫蠻獠猖獗自古然也緩之則豺豕

稀勇于紀而不受命急之則鳥驚魚散依險以自
匿蓋其常態也不務撫馴之使恩威兩行乃欲幸
其有事草薶而獸獮之以求有功一有失律則敗
衄不支上貽朝廷憂此邊吏之大弊也○觀戰國
用兵中原之戰也若今之用兵禦夷狄耳力可以
戰則戰勢利於守則守來則拒之去則勿追則邊
鄙自然無事蓋夷狄之戰與中原之戰異夷狄難
與較曲直是非惟恃力耳但以禽獸待之可也以
禽獸待之如前所為是矣

五峰胡氏曰中原無中原之道然後夷狄入中原也

中原復行中原之道則夷狄歸其地矣○制非用
所以制國也制侯國所以制王畿也王畿安彊萬
國親附所以保衛中夏禁禦四夷也先王建萬國
親諸侯高城深池徧天下四夷雖虎猛狼貪安得
肆其欲而逞其志乎此三王為萬世慮禦四夷之
上策也王公設險以守其國孔子之所以書於魯
坎之彖也城郭溝池以為固孔子之所以答言偃
之問也

朱子曰益之戒舜曰儆戒無虞罔失法度罔遊于逸
罔淫于樂任賢勿貳去邪勿疑而終之曰無怠無

荒四夷來王周之文武亦以天保以上治內采薇
以下治外始於憂勤終於逸樂其後中徵小雅盡
廢四夷交侵中國衰削宣王承之側身脩行任賢
使能內脩政事外攘夷狄而周道燦然復興某嘗
以是觀之然後知古先聖王所以制御夷狄之道
其本不在乎威彊而在乎德業其備不在乎邊境
而在乎朝廷其具不在乎兵食而在乎紀綱蓋決
然矣

西山真氏曰爲國者當示人以難犯之意不可示人以易窺之形昔春秋時晉師入齊齊使國佐求盟于晉其勢亟矣一聞齊之封內盡東其誠之言雖僨軍之餘不肯苟從以紓一旦之禍蓋敵國之相與有以折其謀則爲和也易有以啓其嬖則爲和也難况戎狄豺狼變詐百出又非可以中國常理待之乎○中國有道夷狄雖盛不足憂內治未脩夷狄雖微有足畏蓋昔者五胡之紛擾與單于爭立之事同而拓拔氏之東西與匈奴之分南北亦無以異然宣帝因呼韓之朝而益彊其國劉石符姚之變晉迄不能以成寸功光武因南單于之歸拓地千里而侯景內附適以兆蕭梁之釁所遇略

同而成敗以異者豈固有幸不幸哉蓋光武之政脩而晉梁之政失也

曾齋許氏曰天下事常是兩件相勝負從古至今如此大抵只是陰陽剛柔相勝前人謂如兩人角力相抵彼勝則此負此勝則彼負但勝者不能止於其分必過其分然後止負者必極甚然後復各不得其分所以相報復到今不已如中國與夷狄中國勝窮兵四遠臣伏戎夷夷狄勝必潰裂中原極其慘酷如此報復何時能已三代盛時分別中夏夷狄君子小人各安其分所以大治後世不及也且如周成康漢文景世所謂大治者然土宇廣狹可見彼四君者未嘗事遠略也治吾所當治者而已不取其勝夷狄也故亦不至為夷狄所敗